



REPUBLIKA E KOSOVËS/REPUBLIKA KOSOVA

GJYKATA THEMELORE PRIZREN

Numri i lëndës: 2024:012993

Datë: 26.09.2024

Numri i dokumentit: 06215893

C.nr.295/24

GJYKATA THEMELORE NË PRIZREN-Departamenti i përgjithshëm, Divizioni Civil, gjyqtari Shyqri Hoxha, me zyrtaren ligjore Sh.M. në çështjen juridike kontestimore të paditësve L.A. nga Prizreni dhe M.M. nga Prizreni të cilët me autorizim i përfaqësojnë avokatët A.A. dhe Z.S. nga Prizreni, kundër të paditurës Komuna e Prizrenit, Drejtoria Komunale e Arsimit, të cilën me autorizim e përfaqëson V.I.Xh. me objekt të padisë kompensimi i shujtave, me datë **26.09. 2024**, mori këtë:

**A K T G J Y K I M**

**Pa shqyrtim kryesor të çështjes**

- I. **APROVOHET** kërkesëpadia e paditësve L.A. dhe M.M. nga Prizreni, **në tërësi si e bazuar.**
- II. **DETYROHET** e paditura, Komuna e Prizrenit, Drejtoria Komunale e Arsimit, që paditësve në emër të shujtave ditore, ti paguaj shumat si në vijim:
  - Paditëses L.A. nga Prizreni, në emër të shujtave ditore, për 130 ditë pune (nga data 03.03.2022, deri me datën 20.11.2022), të paguaj shumën prej nga 2 (dy) euro në ditë, apo **shumën e përgjithshme prej treqind e njëzet e dy euro (260.00 €)**, në afat prej 7 ditësh, pas plotfuqishmërisë së këtij aktgjykimi, nën kërcënim të përmbarimit të detyrueshëm.
  - Paditësit M.M. nga Prizreni, në emër të shujtave ditore, për 130 ditë pune (nga data 03.03.2022, deri me datën 20.11.2022), të paguaj shumën prej nga 2 (dy) euro në ditë, apo **shumën e përgjithshme prej treqind e njëzet e dy euro (260.00 €)**, në afat prej 7 ditësh, pas plotfuqishmërisë së këtij aktgjykimi, nën kërcënim të përmbarimit të detyrueshëm.
- III. **DETYROHET** e paditura që paditësve t'ia kompensoj shpenzimet e procedurës kontestimore në shumë prej **njëqind e shtatëdhjetë e gjashtë euro (176.00€)**, në afat prej 7 ditësh nga plotfuqishmërisë së këtij aktgjykimi, nën kërcënimin e përmbarimit të detyrueshëm

**A r s y e t i m**

Paditësit L.A. dhe M.M. që të dy nga Prizreni, përmes të autorizuarve të tyre A.A. dhe Z.S. avokatë nga Prizreni, pranë kësaj gjykate, me datën 12.01.2024, kanë parashtruar padi, kundër të paditurës Komuna e Prizrenit, Drejtoria Komunale e Arsimit, me objekt të padisë kompensimi i shujtave. Të autorizuarit e paditësve, në padi kanë theksuar se paditësit F.J. dhe H.M. janë në marrëdhënie pune te e paditura, të cilët kanë punuar dhe vazhdojnë të punojnë si mësimdhënës në SHFMU "Grnçare" në fshatin Grnçare, Komuna e Prizrenit, e që duke llogaritur periudhën kohore të punës, paditësve i takon e drejta e kompensimit të ushqimit në punë për një ditë pune në shumë prej 2 (dy) euro, në bazë të së drejtës që rrjedh nga Kontrata Kolektive të Arsimit në Kosovë, të datës 22.01.2021, andaj kanë kërkuar që të aprovohet në tërësi kërkesëpadia e paditësve.

E paditura, përmes të autorizuarës së saj, në përgjigjen në padi e ka kontestuar padinë dhe kërkesëpadinë e paditësve si të pabazuar, lidhur me kompensimin e shujtave ditore. E njëjta ka theksuar se pretendimet e paditësve se iu takon kompensimi i shujtave ditore është në kundërshtim me nenin 2 par.1.1 të Kontratës Kolektive të Arsimit në Kosovë, pasi përfitues të beneficioneve që rrjedhin nga Kontrata Kolektive e Arsimit janë vetëm antarët e Sindikatës së Arsimit - SBASHK, ndërsa paditësit nuk kanë ofruar ndonjë provë që janë anëtar të sindikatës. Të paditurës nga ana e Ministrisë së Financave nuk i është ndarë kod buxhetor për përmbushjen e obligimeve që dalin nga Kontrata Kolektive e Arsimit në Kosovë e datës 22.01.2021, andaj e njëjta nuk ka mundësi ligjore për të përmbushur këtë obligim, pasi që bie në kundërshtim me Ligjin për Buxhetin Nr.07/L-001. Gjithashtu e paditura ka theksuar se padia e paditësve është në kundërshtim me nenin 90 par.1.1 dhe 1.2 të Ligjit të Punës Nr.03/L-212, pasi sipas këtyre dispozitave marrëveshja kolektive lidhet mes organizatës së punëdhënësit dhe organizatës së të punësuarve, ndërsa në këtë rast Komuna e Prizrenit është punëdhënësi dhe nuk mund të obligohet në përmbushjen e kësaj kontrate, pa qenë pale nënshkruese e saj. Në fund gjykatës i ka propozuar që padinë dhe kërkesëpadinë e paditësve ta refuzojë në tërësi si të pabazuar. Shpenzimet e procedurës i ka kërkuar.

Gjykata pas shqyrtimit të padisë, provave që gjenden në shkresat e lëndës, si dhe përgjigjes në padi të paraqitur nga ana e të paditurës, në kuptim të nenit 8 lidhur me nenin 152 të LPK-së, gjeti se kërkesëpadia e paditësve është e bazuar, andaj pa shqyrtim të çështjes, e aprovoi kërkesëpadinë si në dispozitiv të këtij aktgjykimi.

Mes palëve nuk rezulton të jetë kontestues fakti se paditësit janë në marrëdhënie pune tek e paditura, përkatësisht mësimdhënës pranë SHFMU "Grnçare" në fshatin Grnçare, Komuna e Prizrenit.

Nga vërtetimi me numër të protokollit 108-19/2023, i datës 14.12.2023, të lëshuar nga drejtori i shkollës të SHFMU "Grnçare" në fshatin Grnçar, Komuna e Prizrenit, gjykata vërtetoi faktin se paditësja L.H. është në marrëdhënie pune pranë kësaj shkolle dhe i njëjti për vitin 2022, dhe atë nga data 03.03.2022 e deri me datë 20.11.2022, kanë punuar gjithsej 130 ditë pune.

Nga vërtetimi me numër të protokollit 108-20/2023, i datës 14.12.2023, të lëshuar nga drejtori i shkollës të SHFMU "Grnçare" në fshatin Grnçar, Komuna e Prizrenit, gjykata vërtetoi faktin se paditësi M.M. është në marrëdhënie pune pranë kësaj shkolle

dhe i njëjti për vitin 2022, dhe atë nga data 03.03.2022 e deri me datë 20.11.2022, kanë punuar gjithsej 130 ditë pune.

Nga kërkesa e datës 03.01.2024, gjykata vërtetoi faktin se paditësit iu janë drejtuar me kërkesë, të paditurës për kompensimin e shpenzimet e ushqimit. Ndërsa me përgjigjen e të paditurës së me nr. të protokollit 69/24, të datës 05.01.2024, gjykata vërtetoi faktin se e paditura i'u ka refuzuar kërkesa për kompensimin e shpenzimeve të ushqimit si e pabazuar.

Vërtetimin e lartcekur, Gjykata e pranoi si provë materiale vendimtare, në kuptim të nenit 329 par.1, të LPK-së, në të cilin paragraf përcaktohet se *"Shkresa të cilën e ka hartuar në formën e caktuar organi shtetëror brenda kufijve të kompetencës së vet, si dhe shkresa të cilën në formë të tillë e ka hartuar ndërmarrja apo organizata tjetër në ushtrimin e autorizimeve publike që i janë besuar me ligj (dokumenti publik), provon saktësinë e asaj që konfirmohet apo caktohet në të"*. Andaj pasi këto vërtetime janë lëshuar nga vet e paditura brenda fushëveprimit të saj, e të cilat si të tilla janë të pranueshme edhe për vetë palën e paditur, ashtu që vërtetimeve të SHFMU "Grnçare" në fshatin Grnçare Komuna e Prizrenit, gjykata i'a fali besimin e plotë, si provë me të cilën vërtetohet fakti lidhur me ditët e punës, konkretisht paditësit L.A. dhe M.M. nga data 03.03.2022, deri me datën 20.11.2022, kanë punuar të gjithë në shkollën e lartpërmendur, me ditët e pranisë në punë, të specifikuara si më lartë.

Bazuar në faktet e çështjes, Gjykata gjen se në rastin në fjalë zbatohen dispozitat e Kontratës Kolektive të Arsimit në Kosovë, me nr.01/B, nr. prot. 105, e datës 22.01.2021, të nënshkruar në mes të Ministrisë së Arsimit, Shkencës dhe Teknologjisë dhe Sindikatës së Bashkuar të Arsimit, Shkencës dhe Kulturës, e cila ka hyrë në fuqi me datë 22.01.2021.

Me nenin 35 par.7, të Kontratës Kolektive të Arsimit, nr.01/B, nr. prot. 105, e datës 22.01.2021, është përcaktuar e drejta e punëtorëve në kompensimin e shujtave dhe atë *"Të punësuarve (antarë të SBAShK-ut), u sigurohet kompensim për ushqim gjatë punës, për ditët e pranisë në punë. Vlera e kompensimit të shpenzimeve të ushqimit në punë, për një ditë pune, është dy euro për të punësuarit të cilët kanë marrëdhënie pune primare në institucionet arsimore..."*. Në rastin konkret gjykata gjeti se e paditura ka pasur për detyrim që paditësve si punëtorë të arsimit, t'ia paguaj kompensimin për shujtat ditore, konform detyrimeve që rrjedhin nga Kontratat Kolektive, e në kuptim të Nenit 55 par.1 dhe 2 të Ligjit të Punës. Rrjedhimisht lidhur me kompensimin e shujtave ditore për paditësit F.J. dhe H.M. për secilin nga ta kërkesa është bërë e arritshme, përkatësisht për periudhën nga data 03.03.2022 e deri me datë 20.11.2022.

Gjykata me rastin e vendosjes, jashtë seancës gjyqësore, është bazuar në dispozitën e nenit 152 të LPK-së, e cila dispozitë përcakton: *"Po që se i padituri me anë të përgjigjes në padi i ka pohuar faktet vendimtare, përkundrejt kontestimit të kërkesëpadisë, gjykata mundet pa caktuar seance gjyqësore, të jep aktgjykim (neni 143 dhe 147 të këtij ligji), nëse nuk ekzistojnë pengesa të tjera për dhënien e tij."*

Andaj, bazuar në dispozitat e nenit 152 të LPK-së, Gjykata ka vendosur si në dispozitiv të këtij aktgjykimi dhe atë pa caktuar seancë gjyqësore, pasi që vlerësoi se në rastin konkret, kërkesëpadija e paditëses është qartazi e themeltë pasi që bazohet në

dispozitat e Kontratës Kolektive të Arsimit në Kosovë, ndërsa shuma e kompensimit vërtetohen nga provat që gjenden në shkresat e lëndës.

Sa i përket kundërshtimeve të paditurës me përgjigj në padi, Gjykata vlerëson se të njëjtat nuk janë të bazuara mbi dispozitat ligjore dhe nuk mbështeten në ndonjë bazë faktike apo juridike. Rrjedhimisht, gjykata erdhi në përfundim se faktet nuk ishin kontestuese dhe nuk ekzistojnë pengesa për dhënien e vendimit merititor. Andaj, mbi këtë bazë gjykata aprovoi kërkesëpadinë e paditësve sikurse në dispozitiv të aktgjykimit.

Vendimin që pala e paditur ti bartë shpenzimet e procedurës, gjykata e ka mbështetur në dispozitat e nenit 449, 452 dhe 453.2 të LPK-së, sipas Tarifës së Odës së Avokatëve, lartësia e shpenzimeve i referohet përpilimit të padisë në shumën prej 156.00 euro dhe taksës gjyqësore në shumën prej 20.00 euro, përkatësisht shumën e përgjithshme prej 176.00 euro.

Duke u bazuar në të dhënat e lartcekura, gjykata ka vendosur si në dispozitiv të këtij aktgjykimi në pajtim me dispozitat e nenit 152 të LPK-së.

**GJYKATA THEMELORE NË PRIZREN**  
**DEPARTAMENTI I PËRGJITHSHËM-DIVIZIONI CIVIL**  
**C.nr.295/24, me datë 26.09.2024**

**G j y q t a r i**  
**Shyqri Hoxha**

**KËSHILLË JURIDIKE:** Kundër këtij aktgjykimi palët kanë të drejtë ankese në afat prej shtatë (7) ditëve nga dita e pranimit pranë Gjykatës së Apelit, përmes kësaj Gjykate.